

OSASUNA. Garazi, Baigorri eta Zuberoan berantago hasiko da



EGUNKARIA
Datorren astean hasiko dute txertaketa kanpaina.

Meningitisaren kontrako txertatze kanpaina abiatu dute Ipar Euskal Herrian

Frantziako Osasun Ministerioak neurri hori hartu du, aurtengo kasu kopurua dela-eta

Erredakzioa | BAIONA

Frantziako Osasun Ministerioak C meningitisaren kontrako txertatze kanpaina prebentibo zabal bat abiatu du Ipar Euskal Herrian, Biarnoan, Landesetan eta Hautes Pyrennes departamenduetan. 0 eta 25 urte bitarteko pertsona guztiek txertoa hartzen ahalko dute, dohainik, heldu den astetik goiti. Baigorri, Garazi eta Zuberoako kantonamenduetan, ordea, kanpaina berantago hasiko da. Kanpainak sei eta zortzi aste bitartean iraunen du. Txertatzea ez da derrigorrezkoa, nahi dutenentzat baizik ez da izan. Ondoko egunetan informazio gehiago zabalduko dute.

Jean-Marc Tourrenchau DDASeko (departamenduko osasun zuzendaritza) zuzendariak kanpainari buruzko azalpenak eman zituen atzo Pauen. Ez da «urgentziatzko» txertoa, ez eta ere «izurrite egoera» batekoa. Jendeari lasai egoteko eskatu zion. Kanpaina horren abiatzeko erabakia aurtan izan diren meningitis kasuen ondorioz hartu du Ministerioak. Hiru departamendu horietan, bertze

KASUAK

Hamar bat kasu

100.000 biztanlerentzat 1,7 kasu gertatu dira 2002an, Pirinio Atlantikoetan. Horieta-rik gehienak Euskal Herrian gertatu dira (hamabitik hamar). 10 urteko haur batek eta 72 urteko emazte batek bizia galdu dute. Urriaren 4tik geroztik bi kasu gehiago izan dira departamenduan.

lekuetan baino kasu gehiago gertatu dira. Azterketa batek dio hiru departamendu horietako C meningitis desberdinen artean «lotura mikrobiologikoa» badagoela. Eritasunaren klonak hiru departamenduen artean dabilela ondorioztatu dute, azterketa horretan.

Gune kolektiboetan bizi direnentzat

Ministerioak txertoen batzorde tekniko bati iritzia eskatu zion. Batzordearen ustez, bertze jendeekin bizi, eskolatu edo zainduak diren 0 eta 20 urte bitartekoentzat «aholkatua» da txertatzea. 21 eta 24 urteko gazteen

kasuan, barnetegietan edo kolektiboki bizi diren pertsona eskolatuentzat da aholkatua txertoa. Haurrekin lanean ari diren adin horretako profesionalei ere zuzendua zaie aholkua. Kolektiboki bizi ez diren ikasleentzat ez dago «horrelako aholkurik emateko beharrik», txostenaren arabera. Txertatze kanpainaren gunetik pasatu behar duten jende batzuentzat ere aholkatua da txertatzea, hala nola hiru departamendu horietako pertsonak zeuden toki kolektiboetan gutxienez gau bat pasatu dutenentzat.

Txertatzeko asmoa dutenek beren sendagilearengana jozteak dute sinpleena, informazio bila. Eskoletan ere izanen da txertatzeko aukera. Baina gidaritza talde batek zehaztuko ditu, datozen bi egunetan, txertatze kanpainari buruzko nondik norakoak, astelehenerako prest izateko gisan.

Horrelako kanpainak ez dira maiz gertatzen Frantzian. Orain arteko txertatze kanpaina masibo bakarra Frantzia erdialdeko departamendu batean egin zen, aurtengo otsailean. Puy de Dome departamenduko ia 100.000 gazte txertatu zituzten. Departamendu hartan hemezortzi kasu gertatu berri zirelako hartu zuten kanpainaren abiatzeko erabakia.

OSASUNA

Azken hiru egunotan lau lagun hil dira Iruñean heroinaren ondorioz

Erredakzioa | IRUÑEA

Lau dira ustez heroinaren ondorioz Iruñean azken egunetan hil diren nafarrak. Fermin Castiella, Nafarroako Droga-menpekotasuneko arduradunaren esanetan, «oraindik ez da erabat ziurra droga gaindosi bat izan denik heriotzak eragin ditue-na». Casteillaren arabera, gertan daiteke heriotzen artean inolako harremanik ez egotea.

Azken hiru egunotan 27 eta 35 urte arteko bi gizonezko eta bi emakume hil dira Iruñean, ustez drogen ondorioz. Lehen bi hildakoak igandean agertu ziren, bat Iruñeako Alde Zaharreko bere etxean, eta bestea berriz Oblatas auzoko lur eremu batean. Bigarren emakumea, berriz, astearte goizean aurkitu zuten etxe huts batean. Poliziak bere daturik argitu ez duen arren, lehendik heroina saltzeagatik atxilotua izan zela uste da. Azken heriotza, berriz, Iruñeko kartzelan gertatu da, hau ere ustez, heroina gaindosi baten ondorioz hil da.

Orain arte ezagututako datuen arabera, etxean aurkitu duten emakumeak beste bi lagunekin batera hartu

zuen heroina, baina beste biek ez zuten inolako osasun arazorik izan.

Fermin Casteillak edierazi duenez, «oso zaila da drogen kalitate txarra izatea heriotzaren arrazoia, azken hildakoaren lagunek ere hartu baitzuten eta ez baitzaie ezer gertatu». Gainera, Casteillaren usteetan, «gerta daiteke lau heriotzen arrazoia bera ez izatea, bihotzekoa edo aneurisma batek ere antzeko ezugarriak baititu». Hala ere, heriotzaren arrazoiak jakin arte egun batzuk igaroko dira oraindik, Bartzelonan egiten ari diren azterketen emaitzak jakiten ez diren bitartean.

Oraingoz Iruñeko Osasun Sailak hartu duen neurri bakarra, informazioa zabaltzea izan da. Fermin Castiellaren esanetan, «drogaren munduan dabilen jendeak elkar ezagutzen du, eta beraz, horrelako gertaera batek eragina izan dezake euren artean».

Osasun Sailak heriotzen arrazoiak zein izan daitezkeen esan nahi izan ez badu ere, hipotesi nagusia heroina gaindosiarena da. Casteillaren esanetan, «Bartzelonako azterketen emaitzak jakin artean ezin da ezer egin».

IMMIGRAZIOA. Nafarroako Parlamentua

Oposizioak dio Immigrazio Planak «hutsuneak» dituela

Irene Arrizurieta | IRUÑEA

UPNren Gobernuak egin Immigrazio Planak «hutsune handiak» dituela kritikatu zuten atzo Nafarroako Parlamentuko oposizio alderdiek, CDNk salbu. Aipatu planak ez duela ez aurrekonturik ez planifikazio eta ezta betetze egutegirik salatu zuten batzordean PSN, IUN-NEB, zein talde mistoak. EA-EAJ taldea ez zen batzordean egon.

Oposizioak gogoratu zion UPNri egun Nafarroan 20.500 etorkin bizi direla eta

horietatik erdiak paperik gabe daudela. Horrenbestez, lagunon egoera legezatzeko Espainiako Gobernuari epe berria zabaltzeko eskatzea onartu zuen Legebiltzarrak. Inmigranteek lan duina izateko bideak ezartzea onartu zuten, gerta daitezkeen «irregulartasunen eta sartu diren mafien aurkako neurriak hartuz».

Immigrazioa «arazo» moduan plazaratzea egotzi zioten IUN-NEBk eta talde mistoak UPNri. Antolatutaz ezean, «arazo larri» bilaka daitekeela esan zuen NEBk.

HAURTZARO IKASTOLAK

Ikasturte osorako Psikomotritzitatean aditua den profesional baten beharra dauka

Interesatuak 943491659 telefonora deitu edo oiartzun@ikastola.net-era posta elektronikoki mezua bidali urriaren 15a baino lehen.

Oharra: Aucouturier eskolako